

# Access digital a la biblioteca ed als museums

Ina nova purschida da l'Uffizi chantunal da cultura

DA MARTIN CABALZAR

■ Ina finamira dal punct central da svilup «Diversidad culturala e linguistica» en il program da la regenza era quella da promover la documentaziun online dals bains culturals sco basa per utilisar e per chapir la diversidad culturala en il Grischun. Per quest intent han la Biblioteca chantunala, il Museum retic ed il Museum da la natira dal Grischun cataloghisà digitalmain las parts impurtantas da lur archiv e da lur collecziuns.

## Biblioteca chantunala

Sco quai che la bibliotecara chantunala *Petronella Däscher* ha infurmà ier ha la Biblioteca chantunala era l'incumbensa da registrar films e portatuns d'ina relevanza istorica da e per il Grischun en ina banca da datas centrala. Quest project haja chattà grond interess perquai che films, cassetas da video, bindels magnetics sco era discs cumpacts sa laschian tegnair en salv mo limitadamain. Instituziuns e persunas privatas hajan fatg numerusas donaziuns u dà numerus emprests, sco per exempel las collecziuns Armano Abeni, Carl Brandt, ils films da Möckli e la collecziun «Cuntrada da films dal Grischun dal sid». In dals films ils pli vegls deriva da Richard Caflisch. Il film mussa il quartier Lürlibad a Cuir enturn ils onns 1920. Digitalisads ed integrads en la banca da datas han pudì vegnir tut en tut 6500 titels, da quels 1900 films, 2400 videos e 2200 documents da tun. Oz èn questas contribuziuns accessiblas sin la pagina d'internet



Infurmaziun da las medias: da san. Ueli Rehsteiner (Museum da la natira), Barbara Gabriella (uffizi da cultura), Martin Jäger (cuseglier guvernativ), Andrea Kauer (Museum Retic) e Petronella Däscher (Biblioteca chantunala).

FOTO TH. GSTÜHL

av-mediportal.gr.ch e pon vegnir guardadas u tadladas en la Biblioteca chantunala sco er mintgamai en las instituziuns che las possedan.

Il segund project da la Biblioteca chantunala è stà da recataloghisar ils inventaris ch'eran registrads en la tezlera. Tut en tut han ins digitalisà 150 000 cartas en il catalog d'auturas e d'aturs,

10 800 cartas en il catalog da periodicas e 208 000 cartas en il catalog da materias. Il team da la biblioteca haja duvrà per questa lavur totalmain 1700 uras. Oz sajan registradas tut las medias da la Biblioteca chantunala dal Grischun en in catalog online, constatescha Däscher cun satisfacziun. Uschia pon ins pia consultar la biblioteca da chasa anora.

## Museum retic

La directura dal Museum retic *Andrea Kauer* infurmescha ch'il Museum retic haja cataloghisà digitalmain parts impurtantas da sia collecziun e preschentia uss quelas en in catalog online a la publicità. La collecziun cumpeggia circa 100 000 objects principalmain istorics e da la cultura populara. La cataloghisaziun da

quests objects che sa chattavan en las exposiziuns u en il local da protecziun da bains culturals vegn fatga en ina banca da datas interna. In catalog online lubescha uss per l'emprima giada ad ina vasta publicità da prender invista da questas datas. A perscrutaders faciliteschia quai enormamain la lavur. Ultra da quai servia il catalog online sco vetrina digitala da collecziuns. El envidia tut las persunas interessadas da svutar e da scuvrir.

En il catalog online figureschan era trais secturs spezialmain desiderads da la collecziun: graficas, textilas e munismatica. Cun elavurar il catalog online èn vegnidas actualisadas numerusas unitads da datas ed èn vegnids fotografads digitalmain bler objects. En il mument pon ins consultar passa 13 000 unitads.

## Museum da la natira

Il Museum da la natira dat tteg a collecziuns da plantas, d'animals, da fossils, da minerals e da crappa. Quest inventari cumpeggia tenor il directur *Ueli Rehsteiner* approximativamain 300 000 fin 500 000 objects, repartids en 180 collecziuns singulas. L'onn 2012 èn ils objects da las collecziuns vegnids registrads digitalmain per l'emprima giada. La documentaziun electronica faciliteschia per l'ina da chattar objects specifics a maun da cretiers per la tschertga e pussibilitescha per l'autra da communitgar cun terzas persunas sch'i dat dumondas pertugant objects da collecziuns. En il rom da questa lavur han ins fatg 9995 inscripziuns e documentà fotograficamain 400 montaschas d'utschels.